

Kawasan lapang bakal digazet

Usaha jadikan Kuala Lumpur metropolis paling selesa didiami di dunia



HIDAYAH HAIROM

KUALA LUMPUR - Sebanyak 3,953 hektar kawasan lapang di ibu negara akan digazet di bawah Bidang Ekonomi Utama Negara (NKEA), pelan Greater Kuala Lumpur/Lembah Klang (KL/KV) dalam usaha menjadikan Kuala Lumpur dan kawasan sekitarnya antara 20 metropolis yang paling selesa untuk didiami di dunia.

Menteri Wilayah Persekutuan dan Kesejahteraan Bandar, Datuk Raja Nong Chik Raja Zainal Abidin berkata, objektif utamanya adalah bagi menambah kawasan lapang yang praktikal dan berguna kepada masyarakat di samping memperluas jumlah kawasan hijau.

Menurutnya, salah satu program di bawah pelan Greater KL-KV yang dilaksanakan adalah Entry Point Projek (EPP) 6 yang menyasarkan penanaman satu juta pokok menjelang 2020.

"Tahun ini kita menyasarkan penanaman sebanyak 30,000 pokok dan setakat ini kita sudah tanam 26,000 di sekitar Kuala Lumpur," katanya ketika di-

temui pada Kempen Smart Tree Re-Generation anjuran Standard Chartered yang bertemakan 'Menyemai Benih Perubahan' di kolam takungan air, Syarikat Mengurus Air Banjir dan Terowong Smart di Taman Desa, di sini.

Hadir sama, Ketua Pegawai Penerangan Standard Chartered Sdn Bhd yang juga Ketua Pegawai Eksekutif Scope International Malaysia, Arif Siddiqui dan Ketua Pegawai Penerangan Standard Chartered, Jan Verplancke.

Pada program itu, hampir 1,000 sukarelawan termasuk 500 kakitangan Standard Chartered, menanam 4,000 pokok di sepanjang kolam takungan air terowong Smart di Taman Desa.

Dalam perkembangan sama, Raja Nong Chik berkata, pihak swasta dan korporat serta individu persendirian dialu-alukan terlibat secara langsung dalam usaha memulihara alam sekitar demi kepentingan generasi akan datang.

"Setakat ini 5,000 pokok yang ditanam di kawasan ini adalah sumbangan daripada sektor swasta," katanya.

Jan Verplancke (kiri) dan Raja Nong Chik (tengah) menanam pokok pada program Smart Tree Re-Generation di kolam takungan air terowong Smart di Taman Desa.